

Script of Evening Gojri News Bulletin 04 November 2024 at 1700 Hrs

ایوننگ گو جری نیوز بلیٹن مو رخہ 04 نومبر 2024

یوہ آکا شوانی جموں بے نصرت چودھری تے عبدالرحمن شاہین تیں خبر سُنو۔ پہلاں خاص خاص خبر۔

* 1. لیفٹنٹ گو رنر منوج سنہا نے اج جموں کشمیر قانون ساز اسمبلی تیں خطاب کرتاں واں مرکز غے زیر انتظام علاقہ ماتہ مقامی ترقی تے بہبود ماتہ فروغ دین واسطے کئی اقدامات غو اعلان کیو ہے۔

* 2. لیفٹنٹ گو رنر منوج سنہا نے کہیو جے حکومت 200 یونٹ مفت بجلی ماتہ یقینی بناوے گی۔

* 3. لیفٹنٹ گو رنر منوج سنہا نے کہیو جے حکومت غو مقصد جموں کشمیر ماتہ اک تعلیمی مرکز ماتہ تبدیل کرنو ہے۔ جھیڑی سرمایہ کاری تے روزگار غا مواقع پیدا کرے گی۔

* 4. تے وزیر اعلیٰ عمر عبداللہ نے اج قانون ساز اسمبلی گا سپیکر عبدالرحیم راتھر ور زور دتو کہ وے تمام سیاسی جماعتاں غے نال یکساں سلوک ماتہ یقینی بناویں۔

خبراں غی تفصیل نال پہلاں عبدالرحمن شاہین۔

LG Adress

لیفٹنٹ گو رنر منوج سنہا نے اج جموں کشمیر قانون ساز اسمبلی سنگ خطاب کیو ہے۔ تے اُنہاں نے مقامی ترقی ماتہ مضبوط کرن تے مرکزی زیر انتظام علاقہ غی فلاح و بہبود غا مقصد سنگ کئی اقدامات با رے اعلان کیو ہے۔ لیفٹنٹ گو رنر موصوف نے کہیو جے

کشمیر ماتہ باقی ملک سنگ جوڑن آلی ریلوے لائن بہت جلد مکمل ہو جائے گی۔ اُنہاں نے صنعتی ترقی تے کاریگراں غی مدد با رے مفت بجلی سپلائی غو وی وعدو کیو۔

اُنہاں نے مزید کہیو جے کہٹ آمدن آلا کُنباں غو بوجھ کہٹاں با رے مستحق خانداناں ماتہ 2 سو یونٹ بجلی حکومت مفت مہیا کراوے گی۔ جموں کشمیر غی اقتصادی اُمنگاں بارے

لیفٹنٹ گو رنر جناب سنہا نے کہیو جے پورا جموں کشمیر ماتہ 46 صنعتی اسٹیٹس ماتہ

ترقی دین غو حکومت منصوبو رکھے۔ لیفٹنٹ گو رنر جناب سنہا منوج نے جموں

کشمیر ماتہ ریاست غو درجو بحال کروان بارے کم کرن غو وی واضع واعدو جتایو۔ اُنہاں

نے کہیو جے یوہ عظم جموں کشمیر غا لوکاں غا اُس پروسہ غو جواب ہے۔ جھیڑو اُنہاں

نے جمہوری اداراں با رے ظاہر کیو ہے۔ اس تیں پہلاں ایوان ماتہ شور شرابہ غا مناظر

نظر آیا کیونجے بھارتیہ جنتا پارٹی غا ممبران قانون سازیہ پیپلز ڈیموکریٹک پارٹی غا

ممبران قانون ساز اسمبلی غی اُس تحریری قرار داد غے خلاف زبردست احتجاج کر رہیا تھا

جس ماتہ دفعہ 370 غی منسوخی غی مخالفت کی گئی وی ہے۔

LG Education

لیفٹنٹ گو رنر منوج سنہا نے کہیو ہے جے اُن غی حکومت غو مقصد جموں کشمیر ماتہ

اک تبدیلی لیاتاں واں اس ماتہ تعلیمی مرکز بنائو ہے۔ تانجے سرمایہ کاری تے روزگاری

مواقعاں در رغبت با رے توجو مرکوز کی جا سکے۔ اُنہاں نے کہیو جے آئی آئی ٹی جموں

تے آئی آئی ایم جموں ماتہ قائم ہون سنگ جموں کشمیر ماتہ اعلیٰ تعلیم غی ترقی

بارے اک نمایاں سنگِ میل ہے تے ان اعلیٰ اداراں نانہ قائم کرن غو مقصد ہنر نانہ نکھا رن، جدت لیان تے خطہ مانہ اقتصادی ترقی لیان بارے انقلابی رول ادا کرنو ہے۔ انہاں نے کہیو جے اضافی طور آئی آئی ایم جموں غا آن آلا سرینگر کمپلیکس غا شروع ہو جان سنگ خطہ مانہ معیاری انتظامی تعلیم تک رسائی نانہ تقویت ملے گی۔ انہاں نے کہیو جے کالج اور یونیورسٹیاں غا ڈھانچہ نانہ مضبوط کیو جائے گو، ان مانہ عملو مہیا کرایو جائے گو تے قومی تعلیمی پالیسی غا اک حصہ غے طور عملہ اور طالب علمان واسطے تحقیقی سہولیات ور توجو دتی جائے گی۔ لیفٹنٹ گورنر منوج سنہا نے مزید کہیو جے طالب علمان نانہ سٹارٹ اپ ثقافت سکھاتاں واں جدت تے کاروبار غی حوصلہ افزائی کی جائے گی۔ تے حکومت جدید تعلیمی ماحول غی حمایت آلا ڈیجیٹل طریقہ تعلیم جس طرح کہ سمارٹ کلاس رومز غی اہمیت نانہ پہچانے۔ انہاں نے کہیو جے قومی تعلیمی پالیسی 2020 غا اختراعی پہلو نانہ عملان سنگ طالب علمان مانہ مجموعی ترقی تے خود اعتمادی بارے صلاحیت پیدا اوین۔ تے اس طرح وے بدلنا منظر نامہ غے مطابق تیار ہو سکیں گا۔

LG Tourism

لیفٹنٹ گورنر منوج سنہا نے کہیو جے سیاحتی سیکٹر جموں کشمیر غی اقتصادیات واسطے اک اہم ستون ہے۔ جس سنگ کئی خدمات تے صنعتی سیکٹر جس طرح کہ ٹرانسپورٹ، مہمان نوازی، باغبانی تے چھوٹی صنعت مضبوط وین۔ اور مقامی آبادی واسطے آمدن اور روزگاری مواقع پیدا وین۔ انہاں نے کہیو جے ان غی حکومت سیا حتی سیکٹر نانہ صنعت غے طور تمام فائدہ پہنچان نانہ یقینی بناوے گی۔ جس سنگ اس سیکٹر مانہ ضروری ترقی و سرمایہ کاری غا مشاہدہ سنگ سیاحتی ڈھانچہ و خدمات مانہ بہتری آوے گی۔ انہاں نے کہیو جے کشمیر تے جموں دوہاں خطاں مانہ نواں سیاحتی مقامات غی تیز ترقی بارے ٹھوس اقدامات کیا جائیں گا۔ تانجے سیلانیاں گا بہتر تجربہ تے مقامی لوکاں غی آمدن بارے نویں باصلاحیت مناظر آلی جگہاں نانہ باندے آئیو جا سکے۔ انہاں نے کہیو جے توی برج پروجیکٹ و مصنوعی جھیل ور کم تیزی سنگ چل رہیو ہے۔ جھیزو بہت جلد مکمل ہو جائے گو۔ جس تیں بعد جموں شہر مانہ سیلانی صلاحیت بدھ جائیں گی۔ انہاں نے کہیو جے کشمیر مانہ ریل بہت جلد پُچ جائے گی۔ جس سنگ کشمیر تے پیر پنجال خطہ مانہ سیاحت نانہ مزید تقویت ملے گی۔

LG Healthcare

لیفٹنٹ گورنر منوج سنہا نے کہیو جے حکومت جموں کشمیر غا شہریاں نانہ جدید ترین اعلیٰ صحت سہولیات مہیا کران بارے وعدہ بند ہے، انہاں نے کہیو جے گرائیں علاقان مانہ صحت سہولیات نانہ بہتر بناتاں واں زچہ بچہ غی صحت مانہ بہتری بارے زیادہ توجو مرکوز کی جا رہی ہے۔ ایمرجنسی خدمات نانہ مضبوط کرن بارے ضلعان مانہ حساس حفاظتی بلاکس قائم کیا جائیں گا۔ انہاں نے کہیو جے جموں کشمیر مانہ صحت، حفاظتی سیکٹر بارے نمایاں بہتری آرہی ہے۔ کیونجے حکومت طبی تعلیم تے صحت خدمات نانہ ترجیح بنیاداں ور توسیع دے رہی ہے۔ تانجے علاقہ غا لوکاں نانہ معیاری و قابل رسائی صحت سہولیات میسر آسکیں۔ انہاں نے کہیو جے حکومت ایم بی بی ایس، پی جی تے نرسینگ غی سیٹاں نانہ بدھان ور توجو دے رہی ہے۔ تے نواں طبی اداراں مانہ

بہترین طبی ماہرین تعینات کیا جارہا ہیں۔ تانجے پائیدار تے اعلیٰ معیارى سحت خدمات نظام سنگ لوکاں غى طبی ضرورتاں نانہ پوراں کيو جا سکے۔

LG Drug Menace

لیفٹنٹ گو رنر منوج سنہا نے کہیو جے جموں کشمیر مانہ سماجی اقتصادی تے تاریخی تناظر مانہ منشیات غی بدعت اک بڑی للکار ہے۔ انہاں نے کہیو جے پچھلی اک دہائی غے دوران جموں کشمیر مانہ منشیات غی لعنت بدھی ہے تے خاص کر نوجوان اس تیں متاثر ہوا ہیں۔ انہاں نے کہیو جے اس سلسلہ مانہ قانون غا نفاذ تے باز آبادکاری اقدامات سنگ اس بدعت نانہ روکن غی کوشش کی جا رہی ہے۔ انہاں نے کہیو جے حکومت منشیات غی لعنت غے خلاف جنگ چھیڑ غے جموں کشمیر غا شہریاں نانہ منشیات تیں پاک مستقبل دین پارے پُر عظم و وعدہ بند ہے۔

LG Road Network

لیفٹنٹ گو رنر منوج سنہا نے کہیو جے سڑک رابطہ اقتصادی ترقی واسطے بڑا اہم ہیں۔ انہاں نے کہیو جے سڑک نیٹ ورک مانہ کافی بہتری آئی گئی ہے تے جن علاقوں مانہ اچوں تک سڑک نہیں پُچی انہاں نانہ وی سڑک سنگ جوڑن پارے مزید کوشش جاری ہیں۔ انہاں نے کہیو جے حکومت مرکزی معاونت آلی سکیمیں جس طرح پی ایم جی ایس وائی تے نیارڈ غے تحت فراخدلانہ فنڈز حاصل کرن پارے جٹی وی ہے۔ تانجے ہر بستی نانہ سڑک سنگ جوڑن غو نظریو حاصل کيو جا سکے۔ انہاں نے کہیو جے ایکسپریس وے، قومی شاہراہ تے جموں اور سرینگر شہراں واسطے رنگ روڈ پروجیکٹاں ور کم غی رفتار نانہ تیز کيو گیو ہے۔ تانجے اس نانہ ویلے سر مکمل کيو جاسکے۔ تے اسے طرح جموں اکھنور، راجو ری و پونچھ قومی شاہراہ ور وی کم تیزی سنگ چل رہیو ہے۔ انہاں نے کہیو جے مرکزی حکومت سنگ نواں قومی شاہراہ پروجیکٹاں بارے وی معاملو چایو جائے گو۔ تانجے اقتصادی ترقی غی خاطر دور دراز تے پسماندہ علاقوں نانہ وی بہتر سڑک رابطہ مہیا کروایا جا سکے۔

یہ خبر تم آکاشوائی جموں تیں سن رہیا ہیں خبراں غا باقی حصہ نال نصرت چودھری۔

CM Speaker

وزیر اعلیٰ عمر عبداللہ نے اج قانون ساز اسمبلی غا سپیکر عبدالرحیم راتھر ور زور دتو کہ وے تمام سیاسی پارٹیاں غے نال یکساں سلوک نانہ یقینی بناویں۔ انہاں نے کہیو جے سپیکر اس ایوان غا متولی ہیں تے ہم نانہ امید ہے کہ وے ساراں نال یکساں سلوک کریں گا۔ ہر رکن چاہے وہ حکمران جماعت تیں وے یاہ حزب اختلاف تیں اُس نانہ بولن غو یکساں موقع ملن چاہیے۔ جناب عمر عبداللہ نے کہیو جے ہم ایوان لوکاں گا مسائل نانہ حل کرن واسطے آیا ہاں۔ بی جے پی غا قانون ساز تے حزب اختلاف غا لیڈر سنیل شرما نے وی ایوان نانہ آسانی تیں چلان مانہ سپیکر غی مکمل حمایت غو وعدو کيو۔ سینئر کانگریس لیڈر جی اے میر نے وی اُن نانہ نواں عہدہ ور خوش آمدید کيو۔ سی پی آئی ایم گا قانون ساز ایم وائی تا ریگامی نے کہیو کہ سپیکر ایوان مانہ تمام قانون سازاں غی نمائندگی کرے۔ اس تیں پہلاں اج جموں کشمیر قانون ساز اسمبلی نے این سی غا سینئر لیڈر عبدالرحیم راتھر نانہ قانون ساز اسمبلی غو سپیکر منتخب کيو۔ اجلاس سویرے 10 بج غے 30 منٹ ور شروع ہو و۔ وزیر ذراعت، دیہی ترقی، پنچایتی راج تے کا پورٹیو جاوید احمد

ڈار نے عبدالرحیم راتھر نانہہ سپیکر غا عہدہ واسطے نامزد کیو جس غی تائید ارجن سنگھ راجو نے وی کی۔ عبدالرحیم راتھر نانہہ ایوان نے متفقہ طور ور سپیکر منتخب کر لیو وے جموں کشمیر مرکزی زیر انتظام علاقہ غا پہلا سپیکر بن گیا ہیں۔

Speaker Address

سپیکر عبدالرحیم راتھر نے اج لیفٹنٹ گو رنر منوج سنہا غو مکتوب قانون سا زاسمبلی غے سامنے پیش کیو۔ ایوان نال خطاب کرتاں واں جناب راتھر نے متفقہ طور ور انہاں نانہہ سپیکر منتخب کرن ور قانون سازاں غو شکریو ادا کیو۔ جناب راتھر نے کہیو جے ہم نانہہ اپنا اپنا علاقہ غی ترقی واسطے مسالاں نانہہ چانو چاہیے۔ انہاں نے مزید کہیو کہ ہم نانہہ ایوان مانہہ صحت مند ماحول پیدا کرن غی ضرورت ہے۔ جناب راتھر نے کہیو کہ اپنی پوری سیاسی زندگی مانہہ انہاں نے ایوان غا اصولاں غی پاسداری کی ہے۔ سپیکر نے 51 اسمبلی ممبراں نانہہ وی مبارکباد پیش کی جہیڑا پہلی وار ایوان واسطے چنیا گیا ہیں تے کہیو کہ موجودہ قوانین مانہہ ترامیم غے نال نواں ضابطہ وی بنایا جائیں گا۔

LG Migrant

لیفٹنٹ گو رنر منوج سنہا نے کہیو ہے کہ اُن غی حکومت کشمیری پنڈت مائیگرینٹ نانہہ وقار غے نال واپس وادی مانہہ بسان غی کوشش کرے گی۔ جس واسطے محفوظ ماحول بنایو جائے گو۔ کشمیری مائیگرینٹ ملازمین نانہہ مقررہ جگہ ور مناسب رہائش فراہم کرن واسطے ٹرانزٹ رہائش غا منصوباں ور کم تیز کیا جائیں گا۔

LG PMAY

لیفٹنٹ گو رنر منوج سنہا نے کہیو ہے کہ مہاری حکومت پی ایم اے وائی غے تحت منظور شدہ تمام دیہی مکانات غی تکمیل نانہہ یقینی بناوے گی۔ مستحق خانداناں نانہہ رہائش غی سہولت دتی جائے گی۔ حکومت تمام بنیادی سہولیات غے نال پی ایم اے وائی مکانات نانہہ دستیاب کرن واسطے 100 فیصدی کو ریج نانہہ یقینی بناوے گی۔ تے اس غے علاوہ پی ایم اے وائی ہاؤسینگ یونٹ غو 100 فیصد سوشل آڈیٹ کراوے گی۔

Railway Special Train

چھٹ غا تہوار غے پیش نظر بھارتی ریلوے مسافراں غا رش نانہہ دیکھتاں واں 185 خصوص ریل گڈیں چلا رہی ہے۔ جس مانہہ دہلی این سی آر تیں سہارنہ، وارانسی، آہ دہیا، لکھنؤ، پٹنہ، مظفر پور، گو رکھ پور۔ پریاگراج، دربنگا، اندور تے ترونتمپور سمیت مختلف مقامات واسطے تقریباً 25 خصوصی ٹرین تہوار واسطے شامل ہیں۔ آکاشوانی نیوز نال گل کرتاں واں شمالی ریلوے غا چیف پبلک رلیشن افسر ہمائشو شیکھر اُپادیائے نے دسیو ہے جے خصوصی ٹرین معمول غی کدماں تیں علاوہ مسافراں واسطے ہموار سفر نانہہ یقینی بنان واسطے چلائی جا رہی ہیں۔ ریلوے بورڈ غا چیرمین ستیش کمار نے وی مسافراں نانہہ فراہم کیا جان آلا انتظامات غو جائزولین واسطے نوی دہلی ریلوے سٹیشن غو دورو کیو۔ آسان بورڈینگ واسطے بڑا سٹیشن ور خصوصی انتظامات کیا گیا ہیں۔ توقع ہے کہ بھارتی ریلوے تہواراں غا موسم مانہہ اک کروڑ تیں مسافراں غی خدمت کرے گی۔ صرف چھلے مہینہ غی پہلی تاریخ تیں اس مہینہ غی 30 تاریخ غے درمیان تقریباً 7 ہزار خصوصی ٹرین چلائی جائیں گی۔

اس غے نال ہی خبراں غو یوہ بلیٹن ختم ہوؤ۔